

Paulo Ena Marere

TITO

Herenai

Puka Aona Irerena 'Abina

Tito hanona Iuda hauna aha'i. 'A ia eraona kabe aonai, Paulo ebaraina ena iuhubeau akana aonai. Paulo ehore Tito hanona Krete kereibuanai ehabona, ia kehore a'ikakauma haukia iha'inikia akana kebabaina 'eka weianai.

Marere neiana aonai, 'abi kori'uaina hauna neiana. Kreta haukia ekia hoahoa hanona a'i tenamo harai (1.10-13). Paulo e'abi, a'ikakauma haukia i'uuaiaikia akana nenuatae aina hauna ena hoahoa hanona katenamo harai. Abomo maearima iba'iobkia taearana Tito ehina bena, ihobona hau mai babi'e maearima 'aru'arukia mai ta'ara'i haukia. Marere puanai hanona Paulo ehore Tito ehina bena hau mai babi'e keba'iobinakia aokia katehamomo. Ia ha ha herekiai aka namokia katebabai mai maearima baika herekiai abomo. Ia hanona opuere 'abikia a'i katehina mai maearima baika kipokia a'i katebaiharatae.

Puka Paipana Apa'uakia

- a. Roba iahu. (1.1-4)
 - b. Tirama ena marea aka haukia. (1.5-16)
 - c. A'ikakauma haukia ekia mauri. (2.1-15)
 - d. Bahiahi 'abikia. (3.1-11)
 - e. 'Abi orekia. (3.12-15)
-

Banamo 'Abina.

1 ¹Au Paulo, Tirama ena ta'ara a'i mai Iesu Keriso ena iuhubeau hau'u. Au hanona teuhuna'u maearima weiakia Tirama etina'anakia haukia ekia a'ikakauma kabarainakia Tirama ena 'abi tohana kate'ioquina weianai Tirama katemariki aina. ²A'ikakauma mai aotipa weianai mauri banai banai katebuabena Tirama hanona aba wa'i baha hanopaka a'i

erama baha aonai mauri neiana e'abi'uai aina, ia hanona a'i nibai'oi.

³Aba eraona 'uaina ba ena rani tohanai ena pou namona ebawaira tinana maearima ikoikiai kate'lobina, weiana hauna nairoro aina, Tirama ibamaurika hauna ebatohana'u ia ena aka neiana ibabainai.

⁴Tito, naha'u tohana eka a'ikakauma hamona aonai, au oi narere beni'o. Tirama aika hamaka mai Keriso Iesu aika ibamaurika hauna aoko'o hoana mai baibua katebeni'o.

Tito Ena Aka Krete Aonai, Kiro Haukia Katea'i taeanakia.

⁵Krete ai ahaboni'o ena poki hanona aka ikoinai a'i teore haukia koa'ia'i harainakia ba aiara ikoikiai aokiai Tirama ena mareai kiro haukia kotina'anakia 'uai akana katebabaina, 'obi abeni'o haunai koaka.

⁶Kiro hauna hanona behoai a'i tikaiahina hauna, atawana babi'ena hamona, nahuna katea'ikakauma abomo aia kateka'aina, a'i kateripuripu.

⁷Pokina Tirama ena aka neiha 'ininakia hauna hanona beho ai a'i tikaiahina, kipona ena nuataeai a'i keka'a, 'ao a'i keopuere noanoa, a'i keinu 'ari, a'i keripuripu, mai moni a'i kenua ki'aina. ⁸Baki haukia kea'i taeanakia ena ituai mai taba namona hauna keroana'au aina, aoberoai kemiaho, bero taearanai kemauri, ena mauri kebaibenitirama herenai, mai aona kebairobe. ⁹Tirama ena 'abi tohana weiana teba'obi aina haunai kea'i 'ini. Taeara neianai ba'obi tohana keba'obinakia maearima aokia keba taburanakia, mai weiakia ba'obi tohana ti'oatana haukia ekia beho kebaberonakia.

Ba'obi Haukia Bai'oikia Kateba'orонакия.

¹⁰Pokina bai'oata haukia bo'okia weia ekia 'abi 'abaea 'abi 'abaeai maearima ti'oinakia, ba weiakia tetarenakia haukia bo'okia abokiamo weia. ¹¹Maearima weiakia kato ba'orонакия 'urukia kepua, pokina a'ikakauma haukia ekia itu haukia bo'ona aokia tibaro'arina, a'i

pateba'obiai tabakia tiba'obiai moni iraonanai haumaea akakia weiakia tibabai. ¹²Kerete haukia kipokia ekia mahabanai hauna ha Kerete haukia ehina benakia etibaha, "Kerete haukia hanona bai'oi haukia, 'aki aiporokia ki'a obokia 'abakia, te'aboro kipokia mo nuakia tiraonanakia."

¹³Neiana hanona 'abi tohana ehinana, ua buonai kobata ki'anakia, weianai hanona ekia hoa hoa katebero Tirama katea'ikakauma taburana. ¹⁴Ba Iuda haukia ekia ori 'ao kikipa 'ai'aikia mai weiakia maearima ekia rauhubu 'abikia aiakia a'i kateo'o, weiakia hanona maearima herekiai timai Tirama ena 'abi tohana ti'oatana.

¹⁵Weiakia aokia tebero harai haukia hanona herekiai taba ikoinai tebero harai, ia weiakia aokia ki'ai tebonu haukia mai a'i tia'ikakauma haukia hanona herekiai taba ha a'i ebero. Ekia raona mai aokia tohana hanona teki'a. ¹⁶Ia ti'abi Tirama te'obi haraina, iamo ekia babai ai

hanona Tirama a'i tia'i taeana. Ia hanona maearima weiakia 'arikia a'i ni'ari haukia aia a'i tika'aina haukia haeamona taba namona ha katebabaina herekiae hanona a'i ketaina.

A'ikakauma Berona Tohana Keba'ibinakia.

2 ¹Ia oi hanona a'ikakauma berona tohana koba'iobi ainakia taeara weianai katemauri. ²Hau kirokia koba'ibinakia katebakiro, ekia hoahoai maearima ia katemariki ainakia, aoberoai katemauri mai ekia a'ikakauma ketabura harai, kate raona'au haeamona katebapahihi.

³Taeara ihobonaimo babi'e kirokia koba'ibinakia Tirama ena nuatae maurinai ketemiaho, baika herekiae a'i kate'uahi 'uahi, 'ao a'i kateinu 'ari, ia aka namo taearakia kateba'iobi ainakia. ⁴Weiana ia katehore babi'e 'aru'arukia kateba marerenakia kipokia atawakia mai nahukia kateraona'au ainakia, ⁵kateaobero mai ekia hoahoai katebero harai, ekia itu akakiamo katea'i rea, katerabo harai, mai atawakia taikiae katetai, weiana hau ha Tirama ena 'abi a'i kebaki'ana.

⁶Taeara ihobonaimo, hau 'aru'arukia koba taburanakia aoberoai katemauri. ⁷Oi hanona taba ikoikia aokiae ihaiha namona kobaihanakia emu babai namokiae. Emu ba'iobi aokiae hanona hoahoa beronai mai aomu tohanai koba'iobi. ⁸'Abi berona tohanai ko'abi'abi weiana tai ha a'i ke'abi ki'a bena. Ba weiakia oi ti'oatani'o haukia katehaumaea pokina herekai 'abi ki'a obona katehinana 'ekana aha'i.

⁹Ta'ara'i haukia koba'ibinakia taba ikoikiae aokiae ekia poki haukia aiakia kateka'ainakia, aokiae kateba namonakia mai ekia 'abi a'i kateba muenakia. ¹⁰Ekia poki haukia herekiae a'i katebainao iamo taeara ikoikiae aokiae hanona ekia namo mai aia ibabua 'au hoana katebawaira tinana, weianai maearima Tirama aika ibamaurika hauna i'ibina katenuataeai taburana.

Keriso Ena Mue Mai Wapuna Naha'imana Aonai.

¹¹Hoahoa uahomakiae kahamiaho, pokina Tirama ena aoko'o hoana weiana maearima ikoikiae keba maurinakia hauna aba ebawaira tinana.

¹²Aoko'o hoana weiana aika niba'ibinaka Tirama ibaki'ana maurinai a'i kahamauri mai hanopaka inuatae aina akakia ki'a obokia a'i kahababai, iamo bakiroai mai beroai kahamiaho, haeamona Tirama ena nuatae maurina kahamauri aina hanopaka neiana aonai. ¹³Aika hanona ua kahamiaho aiho eka buabenai apa'uana weiana Tirama apa'uana mai ibamaurika hauna Iesu Keriso ena mue mai wapuna nuabina naha'imana aonai. ¹⁴Keriso kipona ena mauri ebaibenai aika paukai weiana 'araka ehorenakia babai ki'a ikoikiae aokiae erubunaka mai ki'a aha'i haukai ebaonaka ia kipona 'euna tohaka, maearima weiaka aoka tohakiae nahantuatae rani ikoikiae namo akakia mo kahababainakia.

¹⁵ 'Abi neiakia koba'iobiai mai maearima koba taburanakia, abomo ekia mauriai taba teki'a haukiai mai taburamu maikoinai kobaberonakia. Hau ha a'i koiha haona oi a'i kebamiori po'oni'o.

A'ikakauma Haukia Kateba'oru Aka Namokia Ibabaikiai.

3 ¹A'ikakauma haukia kobaraonanakia Kabamani haukia mai poki haukia ekia hiabu ba'anai katemiaho, aiakia kateka'aina abomo kateba'oru aka namokia ibabaikiai. ²Kohina benakia hau ha herenai a'i kate'abi ki'a, baibuai katemiaho, kate'amari 'amarí, mai katerabo harai maearima ikoikiai herekiai.

³ 'Uainai aika abomo hapo'o, aia a'i haka'ai, te'oi ahinaka habeho, mai hauani ena nuatae akakia ki'a obokia ta'arakia ha'i abomo haonamo ainakia. Haeamona eka mauri aokiai ki'a akakia hababai mai hawamuru, maearima baika te'oatanaka, mai aika ha ha abomo kipoka habai'oataina.

⁴Iamo Tirama aika ibamaurika hauna ena rabo harai mai ena raona'au tewaira tina raninai, ⁵aika ebamaurinaka. Weiana hanona aika eka aka bero paunai aha'i, 'a ia kipona ena aoko'o hoanai ebamaurinaka. Auba Robeai eba'uerenaka harama mue maearima mahamahakai haeao ebamaurinaka. ⁶Tirama ehole ena beruberuui Auba Robe ahakai eheina ibamaurika hauna Iesu Keriso paunai. ⁷Weiana buonai Tirama ena aoko'o hoanai bero ebenaka ia wairanai, weiana aika mauri banaibanoi nahabuabena hauna kaha'ina. ⁸Ba'iobi neiana hanona 'abi tohana, ba au nanuatae oi ko'abi taburaina maearima hanona taba neiakia obokia kateobo. Ba maearima weiakia Tirama tia'ikakaumana haukia hanona kate'ima 'ima harainakia aka namokia katebabai ekia mauri aokiai. Neiakia hanona taba namokia maearima ikoikiai katebarainakia.

Hoahoakia Obokia Herekiai Kokapare.

⁹Iamo po'o baihara taekia, mai rama kupu torikia kikipakia, mai Mose ena rauhubu paunai tibaiara 'ao ti'au haukia herekiai kokapare. Taba weiakia hanona anikia aha'i mai hau ha a'i katebaraina. ¹⁰Baiata hore nibaramanakia hauna rani kori'uaina mai ibaruana korobena, ba murinai hanona kohabo 'abaeana kateba karahina. ¹¹Oi ko'iolina maearima uahomakia hanona taeara tohana tehabona mai ia hanona ki'a haukia, kipokia ekia ki'a tihore tibatohanakia ia hanona tebeho.

Paulo Ena Nuatae 'Abina Mai Banamo 'Abina Orena.

¹² Weiana au Aretema 'ao Tukiko kauhuna kewahi heremu 'ekamu keal'ina raninai, taeara kotabu komai biai here'u weia Nikapoli ai, pokina au ao'u aba a'ia'i haraina weia kamiaho 'ama ranina neiana aonai. ¹³Sena rauhubu hauna mai Apolo ohi kobarainakia ekia harima taearana koa'ia'i haraina weiana ia taba ikoikia tenuatae ainakia haukia katea'inakia.

¹⁴Eka maearima 'obi katea'ina ekia mauriai aka namokia katebabai ba maearima weiakia taba tenuataeai haukia katebarainakia. Weiana a'i tememiaho 'abaea ekia mauri buabuakia a'i temeaha'i.

¹⁵Maearima neia here'uai haukia ikoikiai ekia banamo 'abikia teuhunakia heremu. Emai banamo 'abikia eka maearima ikoikiai weiakia a'ikakauma aonai tiraona'au ainamai haukia kobenakia.

Nabahuba'ari Tirama ena aoko'o hoana ikoimiai heremiai kemiaho.